

四庫全書

集部

欽定四庫全書

集部  
錢塘集卷十二

詳校官庶吉士<sub>臣</sub>馬履泰

檢討<sub>臣</sub>何思鈞覆勘

總校官檢討<sub>臣</sub>何思鈞

校對官編修<sub>臣</sub>莫瞻菴

謄錄監生<sub>臣</sub>和其聲

欽定四庫全書

錢塘集卷十一

宋 韋驥 撰

進賀皇帝登寶位銀狀

銀一千兩

右伏以聖明踐阼方繼照於天區臣子守疆謹貢誠於  
方物前件銀地難愛寶山實效珍虔修任土之儀仰助  
充庭之末冒黷宸旒臣無任瞻天望聖激切屏營之至

謹錄上進以聞謹進

進奉皇太后禮物

絹五百疋

右前件物廣脩中度經緯有倫敬伸任土之儀仰備充  
庭之貢謹錄上進以聞謹進

進奉皇太妃禮物

絹五百疋

右前件物組織成功潔完充幅敬修方物之貢虔奉宮

聞之嚴謹錄上進以聞謹進

賀門下僕射韓相公

右某伏審宣制大庭登庸元宰千官敬聽皆悅而成服  
之心四海亟傳有忻然相告之樂况挺鎔之舊物倍簪  
紱之常情恭以某官間世鉅賢經邦大器學貫古今而  
行之以正智窮事物而決之以誠致主以唐虞之隆處  
躬於稷契之上弼亮久安於王室將明密契於宸衷陞  
應上台之纏總臨百揆之務勢鈞帝賚雅符說命之書

善繼父功美協緇衣之詠贊熙朝於九鼎之重措綿宇  
於一堂之安某營職偏州馳心崇屏望風抃躍雖在輿  
情之先展慶恭勤莫參旅進之末卑誠無任激切依歸  
之至謹具狀賀

賀中書僕射曾相公

右某伏審誕告宸庭進登相位協千官之敬聽聳四海  
之具瞻欣躍所同中外如一恭惟某官生稟明氣出為  
真儒學際天人之微識窮事物之表輔翊王室久全柱

石之功持總兵樞獨運著龜之智當太平之注意遂爰  
立以登庸上賴謀猷之嘉下蘄膏澤之廣忠侔伊尹豈  
容專美於商志邁臯陶奚止賡歌於舜動寰區之鼓舞  
增廊廟之尊嚴某尸祿偏州馳心崇屏聞風抃喜雖在  
輿情之先展慶恭勤莫階旅進之末卑誠無任激切依  
歸之至謹具狀賀

賀樞密蔣正議

右某伏審光膺中詔進貳西樞熙帝載於一時具民瞻

於四海真儒當軸太平之勢益隆輿論同辭誠服之情  
胥悅恭以某官間世異稟經邦鉅材學造聖賢之微識  
通今古之變演經綸而增華國體納謀猷而仰契天心  
爰倚弼諧之惠亟參機密之政文武斯憲未高申伯之  
能股肱惟良雅合咎繇之詠坐振國威之遠行消邊警  
之嚴某假守偏州馳誠崇屏聞風抃躍雖在羣情之先  
展慶恭勤莫階後進之末卑誠無任激切依歸之至謹  
具狀賀



賀內翰曾侍讀

右某伏審拜命楓宸陞華翰苑碩德進而昌時愈盛大  
儒顯而熙朝益尊四方傳聞萬口胥慶恭以某官受材  
宏博造道淵深識洞古今之宜文參經緯之妙出為藩  
屏而仁聲洋溢入掌絲綸而國命光華副南面之簡求  
登北門之清近謀猷密啟雖欽內相之崇膏澤沛餘佇  
聽四鄰之陟某逖拘職守久遠門闌修慶謁以末由伸  
頌言而徒切卑情無任依歸之至謹具狀賀

賀提舉周大夫

右某伏審榮被宸恩美遷使節遺愛實多於吳域按形  
爰領於閩方愈益光華竊惟慶慰恭以某官器涵方格學  
造本原蚤膺遴選之明久播休聲之遠推行良法已深  
二浙之仁明慎盡心將厚八州之福某屬拘符竹徒望  
旌麾莫修慶謁之勤第極傾依之素謹奉狀賀

賀樞密安太尉

右某伏審光奉制恩崇顯樞府播傳四海欣躍一心蓋

鉅賢任重則朝廷益尊輿望愜情則士民胥慶恭以某  
官生膺間氣出佐聖時蚤登廊廟而明若著龜力贊邦  
家而久為柱石日如隙駟奪孝慕之深誠詔趣脂車副  
睿恩之佇見復持機密之政愈壯治安之基固有輝光  
聳具瞻於有衆尚多頌禱聽爰立之休聲某拘守州麾  
阻趨台屏奔馳展慶莫偕旅謁之勤奉跂致誠徒謹尺  
書之獻某卑情無任激切依歸之至謹具狀賀

賀范右丞

右某伏審拜命中宸陞華右轄真賢大任贊至治而益  
隆羣口同辭聳具瞻而交慶恭以某官明誠造道德業  
映時傑然間世之資沛若經邦之術忠誼久陪於國論  
謀猷密契於上心亟奉都俞之音俄遷弼亮之地肅機  
進陟愈光四輔之榮總揆延登猶鬱輿情之望某守符  
海郡引領台階展慶奔馳莫繼簪紳之末望風喜躍第  
修竿牘之勤某卑情無任激切依歸之至謹具狀賀

謝運使程金部薦

右某竊審剡章過形論薦自慙衰晚曷稱推揚伏惟某  
官識度高深材猷宏遠按列城而率之以正察羣吏而  
取之以公雖汲引之仁密啓不遺於舊物而承宣之未  
過情但愧於誤知感厚德以固多馳寸誠而罔究謹奉  
狀謝

謝發運胡龍圖薦

右某竊審剡章過蒙論薦自揣衰遲之迹曷當推引之  
私感焉則深愧亦不淺恭惟某官鉅材超卓厚德淵宏

肩以人事君之心執盡忠報國之節不遺舊物尚垂採  
撫之情載玷公言仍重品題之賜借輝光於朽質助龜  
勉於明時短技何為徒勤勞於末路深仁莫報第銘刻  
於懦衷仰荷睠知卑誠不任惓惓之至謹具狀謝

賀提舉孫朝請禮上

右某伏審光奉宸恩榮移使節涓擇穀旦按臨列城伏  
惟慶慰恭以某官材猷高邁術學淵深蚤膺朝寄之華  
久聳士林之望振提良法將安二浙之情洋溢休聲行

達九重之聽某坐縻官守仰托德庥未緣伏謁於門闌  
姑用馳誠於竿牘謹奉狀賀

賀翟龍圖再知越州

右某伏審光膺明詔再鎮巨藩伏惟慶慰恭以某官秉  
心忠厚植操端方主上庠則學制益明坐南床則臺綱  
尤正藹休聲於睢北久專留鑰之榮復舊治於浙東重  
睹甘棠之茂吏民胥慶旌戟增輝雖期仁政之行必充  
衆欲第恐禁塗之召遽促西還某荷顧夙深托庥伊始

未遑伏謁姑用馳誠謹奉狀賀

賀知衢州陳朝請禮上

右某伏審涓辰已諧昧事伏惟慶慰恭以某官材猷敏  
劭器局宏深久飛譽於仕途蚤陞華於郡守下車伊始  
已矚善政之傳趨節匪朝行聽優恩之被自惟假守幸  
邇餘輝顧馳慶之未遑愧旣音之先及感銘彌甚敷諭  
奚周謹奉狀賀兼謝

賀知越州張大夫



右某伏審光膺休命榮鎮巨藩竊惟慶慰恭以某官材猷高邁器業宏深蚤持使節之華久聳朝紳之望頒條督府悉欽善政之初趨召嚴宸佇聽異恩之擢曾惟衰拙幸托庇庥通謁未緣馳情徒切謹奉狀賀

賀新提刑王司諫

右某伏審光膺詔檢榮領憲臺列城聞風羣口交慶恭以某官材猷高遠器業宏深聲華見慕於簪紳忠誼被知於旒扆輒輟七人之列出奉使華來清二浙之刑亟

卷十一  
為民福某夙承禮遇茲幸德床未緣展謁之勤第謹馳  
誠之獻謹奉狀賀

賀新發運黃大夫

右某伏審光膺詔檢總領漕權伏惟慶慰恭以某官器  
業博深材猷高遠聲采聳簪紳之望設施動旒宸之知  
暫倚宏謀顯東南之大計佇聞嚴召陞左右之近班某  
假守偏州遠叨餘庇莫緣展慶第切馳誠謹具狀賀

賀新運使齊少卿

右某伏審光膺詔檢榮領漕權伏惟慶慰恭以某官受  
材宏博植操端方聲華久聳於士林經畫累更於朝寄  
提綱太府施為實亞於九卿出使列城惠澤佇宣於二  
浙某拘攣假守傾仰高風方茲冒德之初未遂通名之  
敬姑馳誠款少代參承謹奉狀賀

賀新運使程金部

右某伏審光奉宸恩榮顯漕計伏惟慶慰恭以某官材  
猷敏劭器識淵通蚤膺遴選之光久著能名之美承宣

巨屏方蒙愷悌之休經畫一方暫假設施之妙某夙叨  
睠顧幸遇按臨未由通謁於門闌姑用馳誠於竿牘謹  
奉狀賀

賀新知杭州呂太尉

右某伏審顯膺制命出鎮藩方百城吏民萬口歌頌恭  
惟某官元精異稟間世鉅賢學際天人之微術兼文武  
之勝以深智而著龜事物以至忠而柱石邦家當日秉  
鈞妙變調於元化累年分閭廣開斥於窮邊清衷念懇

請之勤愈旨畀承宣之逸擁節旄於左右壯屏翰於東南何幸金吳盡起袴襦之頌唯憂飛詔趣還鼎鼐之司某久遠台階僻顯海郡第知引脰遙想旌幢之光不獲望塵一修桑梓之敬某卑情無任激切依歸之至謹具狀賀

賀新知越州章相公

右某伏審顯膺制命出鎮藩方百城聞風萬口交頌恭惟某官濟時碩德命世鉅賢熙載猶稷契之功致主以

唐虞之道學探聖微而充之以正勲著王室而守之以  
謙鈞軸七年以盡經綸之妙旌麾千里遂操方面之權  
暫輟上台之崇俯從東越之請虧具瞻於四海成厚幸  
於一方偃治方初下絕無襦之嘆詔還不日上隆有袞  
之恩某久冒陶鎔復叨旃庇仰承教約未由奔走於門  
闕敬致悃誠姑用勤劬於竿牘某卑情無任激切依歸  
之至謹具狀賀

回新及第石少府

右某伏審拜命楓宸策名桂籍竊惟慶慰某官天資粹  
美儒學淵通蘊志操以自成獵榮華而俯拾未遑修慶  
先辱長牋感佩所深敷陳罔既謹奉狀賀兼謝

謝提刑白朝散薦

右某竊審露章特蒙論薦自維朴拙曷稱品題仰厚德  
之推揚倍卑悰之感忤恭惟某官秉心純正造道淵深  
按列城而力振典刑察羣吏而精分淑慝豈謂承流之  
末誤膺密啟之知雖賢者居高必欲舉材而報國而陋

儒揆已實慙借譽之過情阻伏門闌第修竿牘不勝懇  
到縷縷之至謹奉狀謝

賀陳漕

右某伏審光奉宸恩榮移使節伏惟慶慰恭以某官天  
材超卓賢履粹精早更省寺之華久聳簪紳之望政成  
二浙海濱方賴於深仁詔下九重河朔遽遷於要任佇  
聞優召行即近班某託庇之初傾風彌切屬拘官守莫  
造賓階喜愧兼深叙陳罔既謹奉狀賀



賀上官正言

右某伏審光膺明命榮鎮巨藩竊惟慶慰恭以知府正  
言受材宏博涉道精深忠嘉蚤著於諫垣澄察久勞於  
使節睿恩甚渥崇加專面之權仁政既揚佇聽近班之  
召曾惟衰舊幸託庇庥未遂參承徒深頌祝謹奉狀賀  
賀趙憲

右某伏審光膺宸命榮領憲臺涓擇剛辰按臨屬部伏  
惟慶慰恭以提刑水部材猷高邁器業宏深聲華久振

於士林委寄蚤登於省戶暫煩使指宣惠澤於一方佇  
聽詔還荷寵光於三接某分符竊幸託庇云初未伸參  
候之勤姑致款誠之獻謹奉狀賀

賀冬

右某伏以剝往復來物心將泰陰消陽長賢履所宜恭  
惟某官植德端方秉心諒直茂擁時休之集佇迎天寵  
之來某屬守郡符阻趨賓次唯謹緘騰之貢聊伸祝頌  
之勤下情不任虔切之至謹具狀賀

又

右某伏以陽復黃宮仄飛子律物心將泰賢履所宜伏  
惟某官順對令辰茂膺純祉陰有神明之相佇迎寵祿  
之綏脩慶謁以莫前致頌言而徒切謹奉狀賀

賀正

右某伏以三陽成泰萬物簇寅時春肇新賢履均福伏  
惟某官秉彝安正順序納休阻修慶以造前第傾風而  
善頌懇誠彌切敷諭吳周謹奉狀賀

回福州柯司封禮上

右某伏審光膺明命榮典巨邦適諧涓吉之宜已謹頒條  
之始恭以某官材猷超越器局閎通藹聞望於周行久踐  
揚於華省壽春宣化既全政術之優長樂偃藩更益兵鈴  
之重遽承枉翰倍切馳誠愧荷所深敷陳罔究

賀提刑祖郎中

右某伏審光膺詔檢榮領憲權伏惟慶慰恭以某官智  
機明穎德量寬宏蚤膺揀拔之公久著風猷之盛仰參列

宿未還華省之聯出按八州尚屈祥刑之察雖莫平於輿  
論已深慰於遠民曾是匪材間睽高誼營職幸同於一道  
指期將借於餘光更冀保調以符頌禱謹奉狀賀謹狀

賀淮西提刑錢朝議

右某伏審光奉宸恩榮移使節伏惟慶慰恭以提刑朝  
議秉心純正履道坦夷藹聞望於簪紳膺選掄於宸宇  
政成閩部已收撫察之功恩易淮西更賴澄清之術方  
依仁而為幸遽去德以勤懷喜悵兼深敷陳罔既

賀新運判李朝請

右某伏審光膺詔檢榮貳漕權竊惟慶慰伏以某官秉心沖厚植操端平蚤膺遴選之精久藹休聲之盛剖符泗水方叨剗剗之明馳傳閩方遽委轉輸之任

賀杭州鄧內翰

伏惟條教始頒福休並集恭以知府內翰諫議誠忱格物智變適時傑然高世之材富矣經邦之業正臺綱而真邪判演宸綽而訓誥明厭真禁廬遂囊封之懇請宣

風鄉梓方錦畫之榮懽固知眷倚之深遽易蕃宣之要  
布中和於列壤寬疲瘵於一方總制全吳隱若長城之  
賴久虛前席佇聞當軸之歸某拘迹官規馳心德誨阻  
望門闌之峻第傳閭里之謠姑獻悃衷仰祈矜亮伏望  
上為邦社精調寢興

提刑范學士移齊州

右某伏審詔從誠請麾易便邦列城之心馳總如一恭  
以提刑學士學行自固德性素高奮迹賢科之雄危言

諫列之峻澄清訟獄久淹擁節之勞偃息蕃宣俄遂判  
章之懇彼望風而何幸此懷慕以不勝政發休聲想弗  
踰於累月恩還重任當少慰於輿情某遽失依歸唯銘  
顧遇悵拘官之有守望行旆以無緣下情無任拳拳瞻  
戀之至

謝賀錢虞曹

右某伏審光膺宸命榮踐郎曹伏惟慶慰恭以某官器  
識疏通性資深厚更仕途而宣力藹朝著以飛聲貳政



殊能美協承流之效陟明優典秩參應宿之榮某幸邇  
鄰輝日欽德望慚致誠而尚緩荷枉教之先貽懇款所  
潛敷陳罔既謹奉狀賀

賀提刑林郎中

右某伏審光膺詔檢榮領憲臺列城聞風交口相慶恭  
以提刑郎中材猷宏遠術學精深誼滿朝紳望高國器  
蚤豫宸衷之簡屢更使指之華淮甸一方茲幸澄清之  
惠霄岐萬里尚淹啟沃之謀某仰德素勤托蹤伊始走

門闌而未迨貢誠款以先馳

賀元龍圖

右某伏審飛詔中天復班內閣一時公議萬口交忻恭  
以知府龍圖器業宏深材猷高遠累更繁劇之選久著  
事功之稱戒在不虞固有除戎之備疾生无妄果成  
勿藥之權還故列之清華顯舊藩之鎮撫佇聽休聲之  
遠即為大任之階某荷德素深傾風尤甚倍常情而忭  
喜悵營職以拘孿展慶莫前馳誠徒切

迎蔡內翰

右某伏審暫違禁掖出撫淮城千里聞風同辭相慶恭  
以知府內翰材謨高遠德業宏深夙膺旒纁之大知久  
作邦朝之重器承流魏觀輶天府之浩穰潤色鴻猷踐  
玉堂之清近尚緩鈞衡之拜俄從蕃翰之榮某仰誼積  
年託庥有日實倍吏民之喜願瞻旌旆之光伏祈順時  
炎涼為國壽重

賀謝交代錢殿丞

右某伏審光膺宸命榮貳郡條將辱交承尤深慰抃恭  
惟交代通判殿丞智謀通敏器識優長望聳仕途聲飛  
朝著外補尚淹於半刺驟遷行擢於全材某自顧拙疎  
幸親契好及瓜而代預喜於吉音解絃而調更祈於善  
繼方懇誠之欲貢遽緘翰之先貽愧感所多叙陳罔既  
轉屯田謝監司

右某伏蒙恩授前件官累日序遷公朝之必信非材倖  
進志士之所羞自惟拜命之初深積省躬之愧反思所

及推致有由此蓋伏遇某官盛德兼容深仁均暨遠俾  
迂疎之品坐逃瘵曠之愆遂忝陟明可非驚寵懼於虛  
受願充稱服之為勉在益恭竊慕循墻之戒庶幾補報  
仰答吹噓

賀鄰郡通判

右某伏審涓辰已諧視事託鄰庥而為幸造門仞以未  
緣勤企風規第馳誠懇

賀鄧內翰復知制誥

右某伏審光膺詔檢載陟掖垣廓然輿情允矣公議恭  
以某官德名超卓術學閎深智窮事物而以正自持忠  
貫金石而以和外表久輟承明之直獨高維屏之功方  
國祀之均釐加宸衷之密睠絲綸復掌固榮舊物之還  
鈞軸在權佇聞大任之召某夙叨顧遇倍劇忻愉伏門  
仍以未緣馳音誠而徒愧

問候太原曾尚書

某言念自違德庇日企台光竊懷疎鄙之嫌慙致情誠

之黷伏惟靜鎮多暇純禧薦臻恭以某官材應昌辰生  
鍾間氣發冑中之奇蘊收天下之休聲事功久贊於朝  
廷器業迥高於級冕輝華八座方攄經濟之謀膏澤一  
方暫屈設施之術鈞軸行聞於迅召儀形庶愜於輿言  
某蚤伏門闌尤深頌禱悵道途之且邈望旌戟以無緣  
伏祈上副倚毗精調寢味

謝成都許龍圖

右某此者叨奉宸俞誤膺使指跂輝光而甚邇圖謁伏

而未緣方馳嚮仰之情遽拜誨音之辱恭以鈐轄知府  
內翰材包經濟學極淵源高文首出於時英偉業久淹於  
法從出持旌節雖安遠俗之心入秉鈞衡始慰四方之望  
不日佇承於趨召惟時當遂於走迎謹泐蕪楫先馳誠悃

賀新運判王朝請

右某伏審光膺綽命榮領漕權八州聞風羣口相慶恭以  
某官材猷宏遠術學精深蚤當遴選之優久著能名之盛  
偃藩凝績尚稽三節之招攬轡宣風暫屈七閩之寄某自



維哀迹偶此尸官竊忻受代之有期何幸高賢之為繼喜  
尤先衆言豈宣心未即晤瞻更祈保衛謹奉狀賀

謝益憲莊朝奉

右某比者叨奉宸恩誤膺使指揣薄材而非據涉遠道  
以徒勞夫何天幸之深獲遇鄰光之盛况眷存之有素  
在嚮往以無窮方圖馳懇以上塵敢謂貽書之先及悚  
若芒背泚然汗顏恭以某官德性宏深誠心純固涵養  
粹和之氣徒容澄按之餘念舊物而不遺誘愚衷而加

勉飛章論薦已銜昔日之恩詘禮見容更荷此時之賜  
伏謁既拘於營職瞻風第切於馳情伏望上為廟朝精  
調寢餘

問候汝州韓大資

右某言念遠去台輝驚矣涼之忽忽仰銜德造增夙夕  
之拳拳雖嘗奏記以致勤返以黷尊而懷畏然鉅賢多  
可必將頻察其依歸而淺士有誠不敢自嫌於僭渎伏  
惟鎮撫多暇福禧薦臻恭以判府大資學達聖微識通

時變柱石寧朝之體著龜大政之機合稷契之謀而不  
顯其忠推堯舜之澤而弗逮是恥暫休熙載之力出即  
偃藩之安屏翰顯居固坐分於重寄鈞衡早復庶下慰  
於具瞻某尸職遠疆馳心崇屏未遂奔趨之謁徒深頌  
祝之悰伏望上為廟朝精調寢味

賀謝梓州路運使秦朝散

右某伏審光膺宸詔榮領使臺宣揚王休慰釋民望恭  
以運使朝散材猷高遠術學宏深累更委寄之勞久著

聲華之盛再煩杖節出臨左蜀之雄即聽封軺入踐清途之要顧惟衰迹幸遇高風在馳慶以未遑遽貺音之先及感慙彌甚敷叙異周

回諸郡知州賀冬狀

右某伏以新陽云復物理將亨吉履所宜人情共喜伏惟某官誠忱有相休祉薦臻在馳慶以未遑遽貺音之先及其為感戢何以喻陳

回謝舉薦狀

右某比形公薦方愧言輕遽辱榮緘益慙意厚欽景謙  
沖之度第增悚感之私

賀冬成都提刑

右某伏以剝往復來物心將泰陰消陽長賢履所宜恭  
惟某官德業兼隆神明來相順迎令序倍擁純休攬轡  
澄清已遺一方之福拜恩優渥即膺三節之招曾是愚  
衷第增善頌勤拳所積敷述奚殫

謝新興元知府蒲大夫

右某伏審光膺詔檢出領藩條千里傳聞同辭相慶伏  
惟某官材猷高遠器度博深嘗持節於此方率銜遺惠  
暫承流於盛府盡愜先聲在馳慶以尚稽遽貺音之首  
及感慙固甚敷諭奚周

回郡官生日星香狀

右某伏蒙勤厚特枉過儀不敢捧當輒違雅意感慙彌  
甚敷叙奚周

賀提舉茶事閭承議

右某伏審光膺宸命榮領使權竊惟慶慰伏以某官材  
猷高邁術學精深早當遶東之明久著能名之盛經畫  
數路茲暫屈於智謀超騰一時將大攄於器業披風漸  
邇為幸良多

謝洋守李承議

右某伏審光膺廷詔榮領郡符伏惟慶慰某官材資通  
敏智識精彊茲承掄選之華暫展承宣之效尚未遑於  
馳慶遽先辱於貽緘悚慙所深叙陳奚既

賀正成都提刑朝奉

右某伏以灰飛青律三陽成開泰之時杓建寅方萬物  
遂發生之志首人正而為重在賢躬而益宜恭惟某官  
秉德粹和受材宏博履茲上日之慶翕若純休之來澄  
按彌年固盡百城之福進陞不日佇聞三接之恩屬官  
守之有构造賓階而莫及第深祝頌曷罄敷陳

謝諸州知通賀正

右某伏以三陽交泰萬物棣通在吉履以尤宜有純休



之來相方圖馳慶遽沐惠緘愧感所懷叙陳曷既

謝鄰郡知通賀正

右某伏以三陽交泰庶彙棣通福履所宜時休來相伏  
惟某官茂膺令序坐擁繁禧在馳慶以未遑遽貽音之  
先及感慙彌甚指諭奚周

賀平章司空相公狀

右某伏審拜冊盛儀面槐正位總二日萬幾之大加三  
公一命之崇增重朝廷之尊慰安海隅之望孰不敬聽

泰然均懽恭以平章司空相公道協聖徵德為世表著  
龜百揆柱石四朝贊主上於三代之隆措天下如一堂  
之樂慶傳渭水素號帝王之師美軼緇衣獨高父子之繼  
畀優游於坐論倍烜赫於具瞻九重之禮命播宣列辟  
之情誠悅服某尸官遠部引領上台相與頌言心雖先  
於民吏恭修慶謁迹阻廁於簪紳卑情無任抃躍依歸  
之至

賀僕射門下相公

右某伏審誕告宸廷進登相位千官敬聽皆悅而誠服之心四海亟傳有忻然相告之樂恭以某官生稟間氣出為真儒極高明而履中庸可久大而充德業弼亮久安於王室將明密契於天心陞應上台之躔總臨百揆之務忠符姬旦助揚文武之休志邁阿衡推廣勛華之澤爰立一騰於綸綍具瞻載聳於簪紳廊廟賡歌正協明良之詠寰區鼓舞即期仁壽之躋某尸祿遠方馳誠崇屏聞風抃躍雖在輿情之先展慶恭勤莫參旅進之

未卑悰無任激切依歸之至

賀門下侍郎狀

右某伏審光膺制命進貳台衡熙帝載於一時具民瞻  
於四海真賢當軸太平之勢益隆輿論同辭誠服之情  
胥悅恭以門下侍郎間世異稟經邦鉅材智侔著龜誠  
動金石居股肱之要而久安國體納謀猷之嘉而密契  
宸衷自天監周正類仲山之迹致君為舜雅同伊尹之  
心入踐西臺之崇增華四輔之重綸綍遽播朝廷愈尊

百辟忻然盡仰國鈞之秉庶毗安若即期壽域之躋某  
尸祿遠方馳情崇屏聞風抃躍雖在羣情之先展慶恭  
勤莫參旅進之末卑棕無任激切依歸之至

賀尚書左丞狀

右某伏審光膺制命進貳台衡熙帝載於一時具民瞻  
於四海真賢當軸太平之勢益隆輿論同辭誠服之情  
胥悅恭以尚書左丞間世異稟經邦鉅材智侔著龜誠  
動金石揔風憲之嚴而久裨國體納謀猷之嘉而密契

宸衷自天監周正類仲山之迹致君為舜雅同伊尹之心入陞右轄之崇增華四輔之重綸綍遽播朝廷愈尊百辟忻然盡仰國鈞之東庶眊安若即期壽域之躋某尸祿遠方馳精崇屏聞風抃躍雖在羣情之先展慶恭勤莫參旅進之末卑悰無任激切依歸之至

回蒲大夫

右某伏審涓辰已諧視事振師帥承宣之始慰士民瞻望之情圖馳慶以未遑沐貽緘之先及感慙固甚敷諭

奚周

回運判來承議

右某伏審光膺詔檢榮領使權幸聯職以相依辱貺音  
之先及喜兼愧至感與慰并伏以某官術學淵深材猷  
宏遠蚤登桂籍之貴遽陟霜臺之嚴外府度財久藉贊  
裨之力遠方將漕暫勞經畫之明念親誼以非遙在馳  
情而固切更祈祿晉以副傾瞻

賀中丞李龍圖狀

右某伏審恩邵固辭榮遷獨坐真賢司憲列職畏威四方傳聞羣口交慶恭以某官生稟間異出符盛明道德表於一時術學窮於萬變九儀贊治曩分宗伯之權八座聯榮久總地官之屬經畫已豐於邦計謀猷素協於宸衷寵加龍閣之名貴陟烏臺之長雖繩愆糾繆又新朝野之風而當軸秉鈞猶鬱簪紳之望某縻軀遠鄙引領高閎謀慶謁以莫前馳誠情而徒極卑情無任激切依歸之至



賀冬成都莊提刑

右某伏以一陽旋復庶彙華萌在天時之布新宜賢履  
之綏福恭惟某官誠心沖厚德性純明對令序以順居  
擁繁禧而翕受百城蒙惠難淹翔步之雄三節召歸佇  
聽攄才之遠曾維頌禱曷罄書言謹奉狀賀

回交代陳朝散

右某伏審光膺宸命榮領漕權自慙淺陋之資乃忝交  
承之契喜愧相半情誠曷勝伏惟交代運判朝散術學

精深材猷宏遠能名已簡於當宁重寄遽移於便鄉  
敵政在前固賴更張之善輿情所悅况多被治之先在  
馳悃之未通俄惠音之已及併增感愧莫罄叙陳

回梓漕井金部

右某伏審遠持使節榮領漕權兼行入疆涓吉視事伏  
惟慶慰恭以某官材猷高遠器業閎深蚤副簡求之精  
累更要劇之選西垣清近尚淹步武之華東蜀間關暫  
屈轉輸之督曾惟衰迹幸遇餘光在馳慶以未遑俄貺

音之先及感慙彌甚敷諭奚周

謝齊卿舉召還臺省

右某竊審剡章過形論薦自惟衰拙曷稱推褒益知冒德之深但有泚顏之愧恭惟運使少卿至誠接物直道佐時列卿蚤振於朝光外府久裨於邦計緩中禁論思之拜領東吳將漕之權豈惟飛輓以助公尤欲搜揚而報國不圖密啓誤及匪材如某者碌碌勸蹤區區假守無良能以聳於衆望無異政以踵於古人徒依厚庇之

卷十一  
餘遂及終更之去復叨借寵殊快過情仰荷仁言貴飾  
曲加於朽質永懷晚節鏤銘第切於愚衷無任感激惓  
惓之至謹奉狀謝

賀梓路提刑李朝請

右某伏審光奉宸恩榮持使節涓吉日以視事按詳刑  
而恤民方幸瞻依實多慶抃恭惟某官受材端正造道  
淵通蚤膺東掖之明累踐要繁之任尚淹翔步未登兩  
禁之嚴暫屈盡心以厚一方之福未遑展謁第切傾風

更冀葆頤以符頌禱

謝運判奉議

右某以奉綸言誤參漕計已消辰而視事幸聯職以依  
仁恭以某官器業淵宏材猷高邁蚤致身於廩仕暫持  
節於遠方積粟阜財一歸於善畫寬民吏久著於休  
聲佇膺不次之恩少愜至公之論某束裝兼道不日趨  
風方圖馳懇之勤遽辱飛文之貺感慙彌甚敷諭奚周

謝提刑朝議啟

右某叨奉恩綸誤參漕計視事剛辰之吉竊輝華使之  
餘恭以某官植操端方秉心冲厚以學術濟通識以德  
量持高材遠方嘗賴於宣風要部復叨於理劇此時閩  
粵暫煩攬轡之清不日朝廷即有封軺之召某依仁茲  
始通謁未由方馳懇款之勤遽辱緘題之貺其為感忤  
曷罄指陳

謝泉州知州陳大夫

右某叨奉恩綸誤參漕計消辰視事猶在於兼行走介

枉書遽承於厚意伏以某官學窮道奧識照幾先久播  
休聲蚤膺遴選榮持使節已豐湖外之財遠剖州符暫  
撫泉南之俗尚稽通謁第切傾風更冀保調以符瞻祝

謝諸州知通

右某誤膺宸命叨貳漕權雖瞻覲之尚賒在誠情而豫  
慰伏惟某官忱恂固守謙厚自持先形誨牘之勤如挹  
風規之茂感慙彌甚敷諭奚周謹奉狀謝謹狀

回本司運司

右某叨奉恩綸誤參漕計方涓吉以視事遽飛文而惠  
音竊服勤誠但增厚愧謹奉狀謝

回福州林中散

右某叨奉綸恩誤參漕計涓辰視事方獲息肩走介枉  
書遽承厚意伏以某官學窮道奧識照幾先蚤膺東擢  
之榮久著能名之盛翱翔省寺既藹於風猷偃息藩宣  
尤高於治最佇聞三節之召以慰衆言之公更祝保調  
以需寵渥謹奉狀陳謝謹狀



賀判太原府觀文范相公

右某伏審光奉詔音榮顯方面凡蒙陶冶舉切抃驩敬  
惟鎮撫之初允協神明之相恭以判府觀文相公生稟  
間氣出為真儒柱石乎寧朝之基著龜乎大政之要正  
論遠參於古訓嘉猷密契於宸衷百揆告勞暫輟鈞衡  
之任列城有賴獨高屏翰之功威懷雖冒於一方瞻頌  
固均於四海願聽上台之復庶安輿議之公某營職遠  
疆馳誠大旆望塵通謁莫偕旅進之恭仰德致勤徒謹

尺書之獻伏望上副眷倚精調寢興某卑情無任激切  
依歸之至謹具狀上賀兼問鈞候謹狀

回福州林中散得替

右某伏審解印還朝擁麾過里方欲馳誠而叙慶遽蒙  
枉翰以遺音欣承跋履之餘克協福休之萃恭以某官  
材猷高邁器業宏深蚤膺旒宸之知累更省寺之要偃  
藩稱治方受代以言旋趨節戒行即拜恩於不次更祈  
上為邦社精調寢興謹奉狀陳賀兼謝



錢塘集卷十一

欽定四庫全書

錢塘集卷十二

宋 韋驥 撰

賀杭州林待制

右某伏審光膺明命榮殿巨邦敬惟鎮撫之餘坐擁福  
休之萃恭以知府待制器涵方格學造本原遠存久大  
之資優踐中庸之域陞華內閣將攄經濟之才移治名  
藩暫假寬平之政迅召願稽於三節疲屯庶起於一方

某違德踰年縻軀遠部每馳情於恭梓第引領於台麾  
慶謁莫前頌瞻徒極伏望上為廟社精調寢興卑情無  
任激切之至謹具狀起居兼賀謹狀

代陳學士賀文潞公加兩鎮節鉞太師致仕狀

伏審光奉冊書仰還政事加上公之袞紱備兩鎮之節  
旄極大臣報國之能盡明主優賢之禮四方交慶萬舌  
同辭恭以某官夙稟元精蚤膺大任德高輔弼聲懾羗  
夷進善去邪聳儀形於百辟出將入相竭忠瘁於三朝

露章堅懇於引年拜命尤榮於佚老熒熒乎功名冠世  
嶢嶢然寵數深前道雖協於伯陽勇於身退望仍齊於  
師尹壯爾民瞻某素冒鈞陶深增抃躍向恩闕而勤頌  
託音驛以馳誠伏望順時節宣副上眷倚

謝李太尉授節鉞謝啟狀

伏審光膺制命榮授節旄伏惟慶慰恭以某官性資沖  
厚器業宏深行學不回養心有術繇親賢而當選尚素  
富貴而守謙虛優游方冊之間澹泊軒裳之際歷歲華

而彌劬動天眷以慰隆重鎮推褒渙若宸恩之異廣廷  
布告翕然士論之歸某瞻德積勤望風馳喜造門闌而  
展慶方念拘文拜緘翰之遜言敢期辱賜悸慙已甚數  
叙奚殫

謝國學秋貢高等行啟

竊審較藝秋闈薦名禮部方坐馳於同喜忽面辱於長  
牋先輩材美而充學優而勵取先多士固已驚於一鳴  
決勝危科更願觀於三捷感懌之甚叙陳曷周



尚書省奉旨召試入高麗界回遠迎狀

恭承明命遠撫遐陬敢謂馳驅之勞特煩候迓之禮  
良深所感姑報以言

謝高麗國王送遺狀

特損緘題曲垂惠贐文犀飾帶知遠物之可珍寶  
匣將儀見深誠之相契免受勤渠之意益增感忤之  
情

回國王叙別狀

茲緣將命屢獲披風宣無外之君恩有加軫卹盡同寅之臣禮足見忠勤方告别以言旋遽貽書之見及既慙厚意更祝善調

與撫守石大人狀

言念矜廣譽以欽風坐馳惟舊造崇閣而請見伏謁未緣仰惟鎮治多餘福休來相恭以某官性資方厚術學精深智遠照微材高應變一麾劇固游及而有餘三節召還佇陟明於不次伏祈為國自壽副人

所瞻

謝監司狀

此者恩綸從請符竹叨榮方祇命以就途遽涓辰而視  
事幸親高庇殊愜深惊伏以某官器識淵宏材猷超遠  
出領外臺之寄上分盱食之憂總治有方均被列城之  
福陟明伊邇佇聞三節之招圖修謁以未緣第欽風而  
彌極伏祈為國自壽副人所瞻

謝轉司農上提轉狀

卿官立貳居者固難其才帝澤優賢得之尤足以貴俯  
伏拜命驚惶失圖何則朝廷清明國家閒暇正臣當軸  
端士告猷臺閣聚精神軒墀多蹇諤爵祿之器安有假  
人車服以庸未嘗濫賞或越等倫而擢其事業或累歲  
月而不及顯高灼然黜陟之行甚若丹青之著僥求者  
罪所以激貪夫恬守者榮所以嘉清節盡出至公之道  
復還治古之風在冠冕之班班宜忠良之一一而某衰  
遲晚節僂俛外藩分符積年剗劇無効昨代歸於泗水

因得請於光山腹背之毛分不增於遠翮口耳之學聊  
自養於微軀咫尺鄉閭優游物局作疎閑之身計期終  
畢於天年豈謂聖睠尚回周行引重不使廢去未諧私  
謀旋領職於富川仍遷曹於右棘而況司農繁乎重寄  
歷代謂之大官竊省匪能曷臻斯地此蓋某官借名特  
甚推庇殊深天幸雖至而不敢自盈官責愈高而第知  
加懼戒存肺腑何必循牆事極慮思願忘閑閣仰答生  
成之賜俯全按舉之威懇歎所潛指陳奚究

代馮漕學士裕享乞恩例狀

右某伏以親裕太堂盛典曠而復修均恩四方服官優者尤幸雖遠駿奔之列亦蒙寵渥之霑協于賞延得以親舉臣有男某長無他技業素學儒念其遭於明時不敢使之自廢儻被乾坤之賜庶幾弓冶之傳其男某乞於文資內安排干冒聖威臣無任瞻天俟命激切屏營之至謹具奏乞以聞伏候勅旨

答梓路提舉王朝散

右某引領高風因久欽於時譽息肩遠部幸竊冒於鄰  
光念馳歎之未遑愧貺音之先及伏惟提舉朝散材猷  
敏劭器識宏通列城雖賴於深仁三節佇聞於迅召更  
祈珍嗇以慰傾誠謹奉啟起居兼謝不宣

問候成都王寶文侍郎

右某言念自違庇冒日企輝光旋叨被於誤恩復載驅  
於遠部旄麾甚邇悵通謁以未由音驛可修愧馳誠之  
尚緩伏惟鎮撫餘裕福休倍臻恭以某官造道粹深秉

心方正諫垣清近夙罄謀猷計省浩繁比勞經畫俄輟  
中臺之重寄暫臨西蜀之雄藩德政融融莫匪去思之  
本民聲疊疊猶多來慕之嗟行俟詔音之傳即聞柄任  
之召伏望上副眷倚精調寢興卑情無任懇禱之至謹  
具狀起居謹狀

謝瀘南畢撫

右某比者銜命之官涓辰視事方竊依於鄰庇尚稽致  
於郵書先承翰墨之華愈重情誠之愧伏惟某官受材



通敏執節端平久參使幕之雄行迺廷恩之渥佇期環  
馭即欵高標更丐珍頤以符善禱謹奉狀謝

賀許右丞

右某伏審光奉絲綸復登輔弼播傳四海驩躍一心蓋  
鉅賢進則朝廷益尊與望塞則士民胥慶況在埏鎔之  
舊固深鼓舞之情恭以尚書左丞稟天元精為國重器  
文章魁傑於當世德業輝華於盛時曩日廟堂端謀謨  
而不撓累年區宇望膏澤之載加果符倚注之深還陟

贊襄之任熙載力罷於大政秉鈞增茂於前休沛然爰  
立之音佇聞於朝夕顯若具瞻之衆始慰於邇遐某尸  
職已陞馳精台屏無緣趨走敬參旅謁之勤姑獻悃衷  
少叙輿情之賀某卑誠無任欣忭依歸之至謹具狀上  
賀謹狀

賀蔡右丞

右某伏審光膺綸綍進秉鈞衡四方聞風羣口交慶蓋  
真賢用則膏澤遠大任重則朝廷尊凡預甄鎔之輩舉

增驪躍之誠恭以尚書右丞氣鍾間異德邁明誠學造  
聖心之微政通儒術之要出為藩屏固久著於治功入  
贊謀猷迺益高於衆望果膺眷倚之重遂陟疑丞之隆  
即聽奮庸究極致堯之效佇欽注意播傳命說之音某  
尸職遠疆馳精崇屏未由趨走一參旅謁之儔姑獻悃  
衷少致輿情之賀某卑誠無任欣懌依歸之至謹具狀  
賀謹狀

賀蔡內翰

右某伏審拜命中宸陞華內相大儒陟用謀猷當密贊之初舉世傳聞抃躍有同辭之慶恭以侍讀內翰為時間出履道中行材高應變之機學至逢原之妙巨藩累鎮宣王化於無窮八座榮躋阜邦財於不擾登北門之清近副南面之簡求潤色訓辭雖極文章之選沛餘膏澤尚淹經濟之資某逖在遠官莫偕旅慶即聽奮庸之任更勤仰頌之誠卑情無任激切之至謹具狀上賀謹狀

賀正旦

右某伏以寅杓始建春律初回人統得天心之中陽長  
為君子之慶伏惟某官誠忱篤厚踐履端平茂膺令序  
之和并集繁禧之粹屬拘官守逖遠風規通慶謁以未  
緣在瞻祈而徒切

問候成都劉樞密

右某言念自違鈞庇日企台光悵久遠於門闌愧缺修  
於竿牘仰惟鎮撫之暇翕受福休之繁恭以判府端明

樞密稟天元精為國重器機密預坐籌之久藩宣分顯  
面之權雲闕九重應佇謀猷之告坤維巨屏尚繫感愛  
之明行聞趨節之光還陟秉鈞之任庶平輿議以愜一  
時某跡限疆封心搖旌戟踧踖未階於參造勤拳徒劇  
於頌瞻伏望上為廟朝精調寢餼某卑情無甚虔切之  
至謹具狀起居謹狀

賀中書許侍郎

右某伏審光膺制命進貳台衡熙帝載於一時具民瞻

於四海真賢當軸增重明昌之期輿論同辭相為欣躍  
之慶恭以某官氣鍾間異道極高明柱石中朝之隆著  
龜大政之要弼亮久安於邦體謀猷密契於宸衷仰膺  
南面之咨詢愈顯西臺之崇峻國鈞重秉愈深膏澤之  
施揆序尚虛猶鬱搢紳之望某尸官已裔引領台階喜  
抃傾風與羣情而竊倍奔馳展慶繼旅謁以未由某卑  
誠無任欣懌依歸之至

賀曾樞密太尉

右某伏審光膺制恩崇顯樞府播傳四方欣躍一心蓋  
鉅賢任重則朝廷益尊輿望愜心則士民胥慶恭以某  
官天元異稟道妙資深燭理有著龜之明安邦如柱石  
之固籌畫折衝於萬里謀猷入告於九重顯奉咨俞之  
音總持機密之政聳具瞻之有衆雖極邇聽爰立之  
休聲尚勤朝夕某尸官已裔引領台階喜抃傾風固倍  
羣情之劇奔馳展慶莫參旅謁之勤某卑誠無任忻懌  
依歸之至



賀蔡左丞

右某伏審拜命中宸陞華左轄真儒大任贊至治而益  
隆羣口同辭聳具瞻而交慶恭以某官高文貫道盛德  
映時傑然間世之資沛若經邦之術弼亮久熙於帝載  
謀猷密契於上心荷眷注以彌深奉恩俞而尤篤肅機  
進陟愈光四輔之榮總揆延登猶鬱輿情之望某尸官  
巴裔引領台階展慶勤拳難追蹤於旅謁望風喜躍徒  
馳敬於尺書某卑情無任忻懌依歸之至

賀王右丞

右某伏審拜命中宸陞華右轄大儒任重助至治而益  
隆羣口同辭聳具瞻而交慶恭以某官謀謨純正德業  
輝光道探本原誠貫金石勸講久參於經幄糾繩屢振  
於臺網銓綜官師方表儀於八座進登丞弼爰翊贊於  
萬機當清衷眷注之隆慰舉世傾祈之素某尸官巴徼  
引領台階展慶奔趨莫厠簪紳之末望風抃喜第馳竿  
牘之勤某卑情無任激切依歸之至

回新渝守王學士

右某伏審光膺宸命榮剖郡符念瞻晤之有期在情誠而竊幸知郡學士文華貫道器業映時輟蓬瀛著撰之功分巴蜀承宣之寄鬱然盛暑想叱馭於險途颯爾清風傳擁麾於近境尚未遑於修詞俄先辱於貺音感懌所深敷陳罔既謹奉狀起居兼謝

賀成都鄭右丞資政

右某伏審光膺明詔移鎮鉅邦百城聞風羣口交慶仰

惟撫馭之始翕受福休之繁恭以判府資政右丞生稟  
天元學窮聖與中臺秉政右轄增輝方成熙載之功俄  
遂偃藩之請北都解印旄倪一意於去思西蜀建牙途  
路共歌於來暮宣化承流而分憂宵旰寬民急吏而助  
治明昌德惠遽霑維慰一方之望鈞衡後任已勤四海  
之祈某違遠台光拘攣巴裔未由進謁敬瞻旌戟之華  
姑用馳誠聊致戡函之慶伏望上副睠倚精調寢興某  
卑情無任激切依歸之至謹具狀起居兼賀謹狀

賀蔣內翰

右某伏審拜命楓宸陞華翰苑碩德進而昌時愈盛大  
儒顯而熙朝益尊莫非胥慶以同辭況在冒恩之舊物  
恭以內翰太守材高應變學粹逢原仁誼充於胸中聲  
聞溢於天下出顯帥閫羗戎重足而畏威入治王畿姦  
盜革心而遠罪伸矣壯行之志偉哉中立之賢副南面  
之東求登北門之清近謀猷審啟雖欽內相之榮膏澤  
沛餘猶為四鄰之望某尸官巴峽引領門闌修慶謁以末

由第頌瞻而尤切佇聆當軸之拜少慰薦紳之情某卑  
誠無任欣抃依歸之至

謝夔守王大人到任啟事

右某伏審精擇剛辰榮臨要郡竊惟慶慰知府大夫受  
材宏博蒞任敏明仕途久播其佳聲朝寄雅當於遴選  
緬想承宣之始已愜民心佇聞謳詠之傳必嗟來暮未  
遑馳喜先辱貽書載欽辭意之勤彌切感慙之素謹奉  
狀賀兼謝

賀彭尚書啟

右某伏審遠抗牙旌榮臨江國涓辰協吉視事謹初千里鈞情一時胥悅恭以知府尚書待制降材高邁造道粹深文章冠天下之英注錯發胷中之蘊被九重之眷遇聳八座之光儀天允懇祈暫偃藩於鄉部世欽德業覬廣澤於廟堂曾是愚衷尤深善頌莫從旅慶之末始獻尺書之勤伏望上為邦朝精調寢餽某卑情無任激切之至謹具狀起居兼賀謹狀

廷評謝授官

右某啟伏蒙聖恩授前件官仰冒寵靈就安里落皆自吹噓之力載華衰朽之蹤愧感交指名奚究

乾元節啓建疏

右伏以薰風應律熙然萬寶之心祥電繞樞盛矣一人之慶幸逢誕聖之日率罄瞻天之誠恭惟體天法道欽文聰武聖神孝德皇帝陛下明配照臨德參覆燾膺一千之景運邁三五之休規未嘗自安荷宗



祖承平之業所以致治得生靈愛戴之情均惟遠方樂  
此華旦效葵霍之傾嚮托謳歌而發揚宸扆光華願齊  
於北極帝躬久固祈比於南山復飭緇黃預精焚誦蕩  
蕩之恩莫報悽悽之懇徒深臣無任望闕祝聖之至

興龍節開啟文

右臣伏以光華盛旦武欽誕聖之期宣演秘文仰祝齊  
天之算緇黃咸集彌月伸虔頌祝同聲普天一致恭惟  
皇帝陛下膺圖有大御極繼明光紹祖宗之基遠隆堯

舜之治祥推繞斗應休運於千齡節慶興龍起驩心於  
率土藉真銓之至妙讚萬壽之無疆今者某官內聲虔  
誠躬臨法會敷揚梵典已凭釋衆之勤懇叩佛慈更效  
華封之禱

賀林樞密

右某伏審光膺中詔榮陟西樞朝進真儒助太平於四  
海仁居高位交慶悅於一時恭以某官間世鉅材元精  
異稟學造聖賢之妙智窮事物之幾銓量士類而八座

推先潤色王言而三長兼善德業夙高於衆望謀猷久  
協於上心果奉疇咨之音進登機密之任公忠許國贊  
成熙載之功膏澤下民行慰具瞻之衆某尸官已裔引  
領台階展慶奔馳莫繼簪紳之末嚮風抃喜姑修竿牘  
之勤某卑情無任激切依歸之至

賀祖提刑禮上

右某伏審涓擇剛辰按臨劇部幸餘輝之將及想清晤  
之非遙復此馳誠以前展慶勤渠所致敷諭奚周謹奉

狀賀謹狀

賀運判李朝請禮上

右某伏審涓辰已諧親事幸於聯職尤切懽悰緬惟衝冒之餘駢集起居之福即期候迓併叙欸誠更冀保調以符跂祝謹奉狀賀

回王學士以生日寄示壽星壽香

右伏蒙尊慈以某生日特貺星香仰荷勤誠固深愧感伏思厚禮難以捧當謹奉狀回納兼謝伏惟照察

賀正

右某伏以萬物隸通化工方盛三陽交泰賢履所宜伏  
惟某官養德冲和秉心端正茲茂迎於令序當倍擁於  
純休佇聞寵陟之光行副瞻祈之切無緣慶謁徒劇情  
誠謹奉狀賀

謝權梁山王朝奉

伏審涓辰已諧視事辱長牋之見及荷勤意以彌多知  
郡朝奉術學素深材猷兼茂臨事肯違於中道長民必

愜於輿情佇聆惠政之傳以慰鄙懷之俟尚遙覲晤更  
祝保調謹奉狀謝

賀謝王安撫轉遥刺再任

右某伏審光膺宸命重綰使權顯矣遙麾之榮優哉連  
任之寄愧馳誠之尚緩荷貽翰之特先伏惟安撫鈴轄  
作坊材器素高聲華夙振投筆蚤當於遴選擁旌靜鎮  
於遐方俄治譽之藹聞致恩輝之被及輕裘緩帶風威  
頗類於祭軍增秩賜金寵異果符於漢表未緣謁慶但

切忻愉謹奉狀陳賀兼謝謹狀

謝新知全州王左藏

右某伏審光膺宸命榮綰郡章伏惟慶慰竊以知郡左  
藏學通儒術智達兵機久攄將領之能果陟承宣之任  
方圖馳慶先辱枉書欣感尤深指陳莫究

賀王運判

伏審涓辰已諧視事竊惟慶慰某官材猷高邁術學淵  
通譽藹周行進膺妙選慙臨遠服方擁節以宣風佇見

列城率鈞權而蒙惠顧惟衰晚同此按廉維謁晤之未  
能在傾馳而彌甚謹先奉狀賀謹狀

回答高麗人使書狀

答正使先狀

伏審遠持使節安乘滄海之舟來奉國憂追仰鼎湖之  
駕方遂披風之便遽承枉教之勤感忤所深叙陳莫既  
謹奉狀攀迎兼謝

答副使



伏審安若乘槎適在中秋之候勤先同軌敬趨七月之期佇弭節以暫休蒙枉書之首及第深愧荷無以諭言謹奉狀攀迎兼謝

答正使謝大排

此者設席肆筵幸使華之戾止飛觴授爵愧主禮之闕然珍題更荷於不遺媿汗固深於有泚謹奉狀謝

答副使

伏承特迂使馭來屈公堂方慙治具之疎更辱飛文之

厚感并於愧言曷究情謹奉狀謝

謝正使送土物

此者授館云初披風既幸雲牋飛翰繼沭於溫言土物將誠更蒙於多品彌懷厚意祗益醜顏謹奉狀謝

謝副使

此者既遂郊迎挹清風而竊幸遽貽篚實嘉遠物之可珍載惟情禮之隆第有感銘之切謹奉狀謝

答正使賀九月旦

伏以降霜及物仰化育之成功合朔在天敬光華之順序伏惟奉慰尚書中和有守業履素高對令節以納休養清心而安正方修調候之禮遽沐緘勝之貽感愧無窮數紓罔既謹奉狀賀兼謝

答副使

伏以節屆授衣在起居之順履禮隆改朔宜詞問之交修伏惟奉慰侍郎局度端平材猷敏劭對此良辰之盛擁夫純祉之休未遑馳誠先辱枉翰感銘茲甚叙述奚

殫謹奉狀賀兼謝

答正使先狀

伏以大明繼照生靈鈞鼓舞之情遠域嚮風玉帛謹梯  
航之獻遽聞使節首逮郡疆沐華翰之先貽在深誠而  
竊愧謹奉狀攀迎兼謝

答副使

伏以寶位嗣興率慶昌辰之盛樓航善濟殊勤遠使之  
來方圖授館以少休遽辱貽書之先及其為欣感曷罄

敷陳謹奉狀攀迎兼謝

答正使謝大排

伏承特枉使華肯臨公燕念酒餽之不腆方竊厚顏沐翰墨之甚勤難當盛意愈深感忤曷究叙陳謹奉狀謝

答副使

此者載飭肆筵特蒙枉馭公堂酌醴漫勤獻酢之儀賓館濡毫更辱緘題之貺唯其叙感何以措辭謹奉狀謝  
謝正使送土物

伏以郊迎既展幸際覲於清標方物遽貽獨煥慙於厚禮情重感言莫能周謹奉狀謝

謝副使

伏承特損華緘曲垂美貺禮將誠而兼重物自遠而愈珍愧荷良多紓陳奚究謹奉狀謝

答正使賀九月旦

伏以金行脫節方物理之告成月吉佳辰在人情而重始伏惟朝賀尚書秉彛正履持節出疆茲逢氣序之良

宜擁福休之集方圖修詞遽辱貺音感激所深指陳難  
盡謹奉狀賀兼謝

答副使

伏以秋時云暮月朏欲生蕭然爽氣之來安若直躬之  
履伏惟朝賀侍郎公忠出使順養順時遘令序於海邦  
納殊休於賓館將馳詞候俄首沐於貺音祇荷謙勲第  
倍深於銜感謹奉狀賀兼謝

答正使重陽

伏以龍山吹帽傳晉彥之風流藍水看萸播唐英之吟  
詠伏惟朝賀尚書遠攄賢業出擁使華將趨雙闕之嚴  
甍憇四明之隘適逢令節倍納純禧顧馳悃之未遑遽  
貽緘之先辱情誠深荷筆舌奚殫謹奉狀賀兼謝

答副使

伏以江涵秋而鴈翼初飛曾動齊山之詠菊盈把而酒  
樽入望素傳彭澤之情伏惟朝賀侍郎遠泛鯨波將趨  
鳳闕伏忠懷而濟險遇佳節以納休修問尚稽貺音先



及在感慙而相半欲敘述以難窮謹奉狀賀兼謝

答正使先狀

伏審畢使事於天庭悠然回棹趨歸期於海域復此取  
途將伸候迓之勤先沐緘題之貺第深感刻難罄敷陳  
謹奉狀攀迎兼謝

答副使

伏審奉幣造朝已致候藩之禮遵程還國載揚使節之  
光方欲展於郊迎俄先形於書貺其為感戢無以喻云

謹奉狀攀迎兼謝

答正使不赴大排

茲者將修主禮之勤庶幾肯顧未許使華之辱敢不敬從在跂望以彌深欲指陳而莫究謹奉狀謝

答副使

伏以敬邀軒從肆筵愧乏於嘉聲遽枉牋題左顧不蒙於重諾第勤嚮望難盡叙陳謹奉狀謝

答正使賀五月旦

伏以律當午位氣肇一陰屬改朔之令辰有安時之妙  
理伏惟奉慰尚書秉心處正順序納休茂膺穀旦之和  
倍擁繁禧之集阻趨舍館辱枉緘題荷德固深撫躬增  
愧謹奉狀賀兼謝

答副使

伏以晏陰成物允協令時合朔在天欣逢穀旦恭惟奉  
慰侍郎才華輝映器宇恢宏深明消息之機倍納駢繁  
之祉未遑展慶先辱貺音徒積覲顏曷勝染翰謹奉狀

賀兼謝

送答正使物帛

伏以寵貺物儀永佩至勤之好敬馳餽贐敢將匪報之誠具列別牋第增深愧謹奉狀諮聞

送答副使物帛

伏以持節而來既首貽於方物揚舡以往取輒獻於贐儀聊致微誠具陳他幅謹奉狀諮聞

答正使先狀

伏審肅奉國珍望赤墀而入貢茂膺宸渥擁華旆以言  
旋將遂披承先貽緘翰仰佩謙勤之意益深銘感之誠  
謹奉狀攀迎兼謝

答副使

伏以望雲來貢蚤幸覲於風規航海言還將載瞻於聲  
采首貽華翰益佩撫謙感愧之深數宣曷究謹奉狀攀  
迎兼謝

送答正使物帛

伏以南國珍竒過勤來貺中州菲薄輒浼將行雖誠意之有加愧物儀之不腆具陳別幅尚憚虛拘謹奉狀諮聞

色羅七匹色綾八匹色紗一十九匹土絹四匹

右謹隨狀塵浼伏惟留納

送答副使物帛

伏以曩貽方物深荷意於勤隆茲奉贐儀竊懷慙於輕浼有少微品具于別牋謹奉狀諮聞

色羅八匹色綾一十匹色紗一十九匹土絹四匹

右謹隨狀塵浼伏惟留納

答正使謝赴大排

茲者肆設維勤仰威儀之秩秩獻酬有序敬德義之溫  
溫方慙情禮之疎又辱緘題之重欸誠所積筆舌難窮

答副使

茲者開筵有待慙不腆於豆觴擁節肯來幸少留於輿  
馬不圖謙德更辱華緘感與愧并情非言盡

答正使賀端午

伏以角黍薦甘靈符祛癘襲風流而惟遠驚節候之遽  
遷伏惟奉慰尚書德度汪洋材資瑰瑋邁良辰於行館  
集休祉於直躬方圖竿牘之脩首沐緘縢之貺其為悚  
荷莫盡指陳

答副使

伏以乘時採藥幽人矜肘後之方當晝曉書高士銜腹  
中之蘊伏惟奉慰侍郎霜松挺節火玉凝姿順履令辰



宜膺多福方欲馳誠而修慶遽蒙枉翰以示謙懷感實  
多形言難盡

上王內翰書

具位某謹齋沐裁書有獻提舉內翰閣下某聞道之難  
行也唯德可以行之道之難明也唯文可以明之以德  
而不以文其傳也不足以遠以文而不以德又可傳乎  
哉二者相湏而成以為斯道之主者必有命世者當之  
孔子沒異端起邪說誣民孟荀揚相繼於曠代而以是

為已任使聖人之道復振於頽圯墜絕之間而後之人  
不陷溺其良心者皆其力也久而陵夷至于有唐獨韓  
氏奮起排非救失其功不後三子降及五代彫敝尤甚  
我朝之興剗革衰亂雖百有餘年而教化已被然而世  
之士類未能向本學以組綉為得而不知有經術之用  
行以智巧相高而不知有仁義之守鉅人間出往往橫  
身肆力圖所以矯變之趣若其德足以行文足以明堅  
厚醇粹傑然而不可擬者唯公一人而已天下之士踐

履術業有所未正莫不指公以為羞其間至與不至雖未可以量其於翕然成風疊疊不已而日入於敦實之域豈為小補焉且公豈人人而教之乎如人人而教之則力亦不給矣然則何以哉公之文本六經而明之者也公之德安中庸而行之者也其所以育天下之材者以此也夫唯如是則公之功又不後於韓氏也去韓氏之遠想見形采而不可得猶襲其繪像之遺而瞻慕之況生而與公同時竊被教育而不能一拜于左右豈不

負矣哉此士人所以汲汲爭先於門闌也某生而貧賤不能他為以讀書考古為事性雖顛蒙粗識所向當在幼少固已知公之誼可為依歸迺致誠款請聞名於將命而公從容降接不以不肖視之諄諄導諭勉之以充擴之本期於有所植立方是時受公之賜不為不多也既而冒取祿仕渙忍塵土不邇輝光者逾一紀焉奔走之隙雖不舍所學以期樹立第所得之寡不足以補其所亡返思曩時導諭之重誠可深愧然而天下之士竊

被訓育猶以不拜左右為所負況某也承教之舊豈以  
歔然于心而自絕於大君子之庭哉是敢叙悽悽以聽  
命於屏下謹獻近所為論一編鄙淺無取徒為摯見之  
禮且以發請誨之端也干浼威嚴不勝惶懼不宣某再  
拜

上滕舍人書

月日具位某謹再拜上書糾察舍人閣下某聞古之君  
子所以大過人者以其善推所為以及人知富貴利達

之所以自任而不以富貴利達之勢介放胷中則位益高心益廣其所以推而及人者日益遠且大也於所及人之間其數甚博而莫大於道義樂育其類夫樂育之者非在於日講月諭規規諄諄於尋寸毫髮之中彼能適然而向我者我察其材志而扶導之引翼之使之自我而至於有為而后止此誠大君子之任也恭惟執事以巨材厚德致身高顯所施廓大皆有原本欲以兼天下之善而未嘗以翺忽矯天下之士真所為知富貴

利達之自任而不以其勢介於胷中也士人滿門其被  
扶導引翼之賜者為不少益以日月則孰不至於有為  
真所謂善推所為以及人也某江湖野人幼喜讀書二  
十來京師求祿仕同時進取之流素不識面者往往或  
道名而指背究其所緣皆執事譽飾之致也未幾附風  
雲之末僅竊科第一落塵土閉關無狀雖自信之心愈  
於前時而蹤迹渙忍去門闌日以踈也因循歲時幾十  
五年今日赴銓衡會執事有典制之拜地雖愈崇而微

叢之舊不敢自棄於將命謁既上矣執事遇之如平昔  
詢之以術學勗之以不倦益又知執事以利達自任而  
忘其勢欲推所為以及人之甚也使某也愚而無所欲  
為則已如欲有為則舍執事之門奚往哉謹錄新文古  
律詩共八十篇塵獻几席非敢以為文章徒以為請教  
之資且明年雖加而學未盡也惟執事不以狂狷之進  
而咎之不以挾故之問而欲之則幸甚幸甚干冒威重  
不勝戰懼不宣某再拜



上太守書

月日具銜某再拜獻書某官閣下夫櫟題之材施於大  
厦能勝其任者棟梁借之勢也腹背之毛傳於鷦明舉  
而冲天者六翮借之勢也雖有利鏃與之勢則犀革可  
貫否則魯縞不入雖有輕車與之勢則千里可至否則  
跬步不進豈物獨有是殆人亦然矣今天下之吏官小  
而任重者縣令為甚縣令之權裁制萬室雖舒慘在手  
而其勢實資於刺史刺史與之勢則利可以興害可以

去事之疑者可以聞政之便者可以專所革易以遷所  
集易以成下之難化者不能輕議以動搖若然患冒中  
無有耳何為而不得哉其於幼學而壯行庶幾無憾也  
刺史奪之勢則利不可興害不可去事之疑者不得以  
聞政之便者不得以專所革難以遷所集難以成下之  
難化者莫不輕議以動搖若然惟擯斥是憂奚暇於設  
施乎故曰在下位不獲乎上民不可得而治矣然獲乎  
上有道非脅肩諂笑耦意求從而獲之也必將誠於身

悅於親信於友然後獲之也獲之不敢豫於已曰有義  
不獲不敢非其上曰有命然則不賢者能若是乎故上  
之人孳孳聽察者假借於其賢者以其有為也其不敏  
生於田野不習他技專意經史遭時得官才不應用強  
勉驅策為貧而仕自此闕拆所向未能發其志所立未  
能聞於時塵泥十年食粟而已誠可羞愧今此何幸更  
于執事鎮撫之下得邑褊小尤利於拙視事六月矣無  
分寸之美挂人齒牙而譴責不及誠執事庇育優賜也

然而迹遠麾旆無緣時伏左右仰聽教命且致一言以宣鄙心之萬一惟日餒矣祇役茲便來拜庭下豈復默默以自取棄故敢叙其說干叩將命以為資勢之兆則於從政也豈云小補哉覲執事亮其誠不以狂妄咎之則幸甚幸甚不宣某再拜

上通判官

月日具銜某齋沐拜書某官閣下某聞聖人之言曰君子易事而難說說之不以道不說也及其使人也器焉

小人難事而易說也說之雖不以道說也及其使人也求備焉嗚呼斯言至矣乎夫易事則人樂為用而難說則君子進焉以君子之高明粹美而其類日進於前故其智慮益廣而其道益尊也雖事則人不樂為用人不樂為用而易說則小人進焉以小人之狹隘教僻而其類日進於前故其智慮益淺而其道益卑也然則小人之事易事也雖有便巧之資捷給之材求耦其意而為之任也固不可得矣若夫善悅則將安施乎君子之事難

事也雖有宏遠之器兼濟之術求其見信也固不可得矣若夫妄說則其能為乎是以古之君子擇所事而事之未嘗妄仕也至有膳肉不及不稅冕而行千里而至不受祿而去必不得已則乘田委吏抱關擊柝為辭富辭尊之計耳今之仕者非若古人然古人之仕於魯不合則於齊又不合焉則於鄭於陳於楚於燕俟其合而止也今人之仕受官於朝隸職於外唯其所事而事焉姑潔已自信理義自養迺其遇之難易有幸與不幸也夫

何擇哉幸而得所事不披心腹極思慮蚤夜孳孳竭其  
所能而為之用者可謂智乎某無狀幼而罷軟不能任  
農工之勞又恥遭明時而不自植立不得接踵薦紳以  
設施仁義之蘊謀明王道之原故勉力讀書十年而仕  
仕十年矣而官為縣令食粟而已所為蓄縮未足動人  
耳目而際昔賢之畛域唯夙宵皇皇常恐碌碌與俗吏  
相類仰於一世中耳乃所幸者獲事執事之賢且明也  
到官之始趨謁庭下執事引之坐未霽威誨語諄諄不

已廼知執事開易事之心而少加亮於愚衷也坐局臨政行將滿歲而不被譴斥豈非執事之賜乎圖欲俯伏左右道冒中之一二且聽教命而執事遠臨他郡又數百里而遠也所守拘繫願未獲伸第瞻頌盛德而不知止極充於心而形於言故筆之書以寓獻几格恭惟執事信道甚篤自知固明不以其言為妄說也至於披心腹極思慮蚤夜孳孳竭其所能而為之用則某不敢棄智就愚而失所事於君子也干冒尊嚴不勝惶恐不



宣某再拜

上章郎中書

某聞古人有言曰幼而學之壯而欲行之夫行之有二窮則行之身達則行之民行之民之尤切者宜莫若郡守縣令守之於令卑高之相遠其間不能以寸雖所施有大小而其趣無以異也而其治未嘗不相資以成守得其令可遺一邑令有賢守有遺一身遺之非忘之也無可慮之患而知其必以濟也若其不虞之憂則君子

不憂且郡守筦攝其下有貴重之勢視令之才則變置之易如奕碁耳至於得其人猶悅以自慰況令焉者進退在守而獲遇其賢且明則其樂而自幸也宜如何哉樂於中必形於言既樂矣苟為能言不宜緘默以自舍然或遲遲其言者蓋將待可言之際耳故曰言未及之而言謂之躁言及之而不言謂之隱非躁非隱其可言之際乎善知本者事其上之賢也不當以是夫某不敏生田壟間幼不他習而喜於學學十年而仕仕之年十

而治官纔再耳僂俛其位夜氣以存雖毫髮之務不敢輕以視從公之餘則頻仰羣籍資取理義以益胃中之未逮能雖未知抑不可謂不知其本者矣臨邑無狀逃責逾歲始獲事於閤下迎拜麾旆之初固已樂而自幸矣然而視不敢仰語不敢出縮縮然與於旅進之後非愚於自棄也誠以塵賤之迹未見亮於閤下苟言之不既失於躁乎今聽命於局三月矣政無可稱而譴斥不加鄙朴之守庶幾稍安而閤下必少加察也居可言之

際或反箝結以自隘某獨何心哉故敢叙其款以露獻於左右冀閣下憐其誠而納焉則幸甚幸甚干冒清嚴不甚悚息不宣某再拜

謝章守書

某謂詭言似正順言似佞苟辨其詭不可惑於似正而取焉苟察其順不可惑於似佞而拒焉是為知言之至也某今日之言順言也恭惟明公不以似佞而拒之夫師帥千里如古諸侯之任近而與生民興利去疾遠而

為天子宣布風化非高明簡重知治體之君子明敏而才者將子子苛刻務為煩碎非徒無益而又擾之迂而滯者將靡敝不振坐視其下受惠而已耳且自淝而東婺為大邦人多高貴習俗素薄悍鬪訟相軋務勝朝廷難其尹而別為簡擢之地明公居之期歲矣政舉治成得寬猛之中吏民帖然莫不心悅而誠服真所謂高明簡重知治體之君子也某竊守下邑偃仰教命之久惟知貫行夫復何措明公不以某為不才召置節下使

治訟數月雖朝夕僂俛悉力從事而昭昭之前事至見  
本重輕取舍罔或違道指諭條理無有齟齬徒欲作聽  
明為毫髮之補不可得已退歸故局遽遠言誨乃心茫  
然如失所依徐而精思第知仰公治體之明而頌公盛  
德之美耳明公恩於鄙朴矣不有佞言干求之疑是敢敷  
為順言以獻左右在明公自知不惑必不謂其似佞而  
拒之也干冒清嚴情慙顏泚不宜其再拜

謝楊倅書

夫挾故而問君子所不答也何則資於師者不當恃舊  
故而易視之苟有恃而至其不受之宜矣此特以道義  
之貴雖一問焉不可有所挾況從政事上其勢愈於彼  
其又可以有挾乎蓋曰法在焉而已耳且義之末然後  
有法及其至也義或不勝其重上下有分之謂法故舊  
不遺之謂義今從政事上而不可挾故是義不勝法之  
重昭矣然而上焉者主於法而義得以兼下焉者唯守  
法而俟其義而已其拜閣下之德舊矣典邑于此復冒

閣下之庇曩者被檄假治督郵朝夕趨走左右言必公禮必吏私心歔然不敢有一芥之挾曰守法可也閣下霽威嚴而接之又援之以備所薦豈獨主於法而兼義邪殆將先義而後法也還邑七八日驟違門闌惟仰高威義之不暇情動語發書畫不能究盡姑獻其畧以瀆視聽幸閣下少加亮焉不宜某再拜

上使憲使書

夫士之有常心而不變於異物者以其仁義禮知根於



中非有待於外而然也故富貴不能淫貧賤不能移威武不能屈其所以自視常歆然而其志未始一日倦於為善非所謂慕賞飾而畏罰沮也其知天之所與而趨向操守適當然耳是故其臨下也恕其事上也忠取舍有義進退有命卷而畜之終身無足憂充而擴之兼善固有餘裕志得不以泰不得不以憾求乎在內而不求乎其所以不在焉故曰人知之亦囂囂其尊德樂道不如是不足以有為也然則有是心也豈或詭激以取聞乎

美言以求合乎不由是而聞不由是而合其必歸於與  
正也天下之與正者常少而好詭激說美言者常多是  
以士之有常心者不常聞且合也某愚無似學粗知本  
匏俛微宦一紀于茲所施蓄縮固不足道而滋養舊蘊  
不舍所受未嘗敢以簿領冗未而輒忘去也若其尊德  
樂道雖未足以有為有亦庶幾有常心而不變者矣恭  
惟明公宿德大度敦與正之心按視一道察羣吏之知  
長善否昭如秋陽明白不可蔽至於詭激美言皆明公

之所不取也某今日之幸以屬邑吏迎拜麾旆之下獲吐一辭以歸高誼豈所謂取聞求合之正乎亦樂於見賢而不得閉默以自棄也惟明公察焉而進退之不宣某拜

上王漕書

某月某日具銜某上書某官閣下某幼貧而愚不能習知他事唯讀書考古學為文辭規速化之術且不自度謂仕則行道如反掌耳弱冠而得官奔走十餘年志未

及舉氣未及舒凡至所措置去離繩約僅或容髮則有履禍之畏況道之欲行其可竊覲邪所不失者從公之餘則偃仰圖史耽味經籍究前人之是否評衆事之得失發於詞章議論誠雖不才固亦足以自樂也得是樂也其敢謂之自致乎幸而隸明公按舉之下民信吏戢庶務條理故朴鈍之守亦見包蓄而不加擯斥遂得樂於此耳然不幸所典窮僻不得一拜麾節仰聽教誨以發胷中之未逮則前所謂樂者抑未為足矣今將代歸

豈宜無言以謝鉅德具宣鄙心之萬一哉謹致文字若干非敢以為文庶公知治下之吏有荷公之賜而得樂如此也干冒清嚴無任悚息不宣某再拜

上王漕攝青谿書

今月七日伏奉使檄差權睦之青溪青溪劇邑宜得才者以當剗治如某等輩僅守繩約何足任使而執事遣之承乏意將驅策鈍弱使之動心極力以成駿健也固當奔走承命不可少緩然敢以辭者某頃在東陽閱歷

半歲近被音旨纔復舊局家有疾病治療未起遂即遠  
道實所未堪且官期逾邁代者至不可度日月不多政  
不能久徒使兩邑擾於送迎耳是敢敷露愚欵仰叩將  
命伏惟執事容德照隱察其悽悽而安全之則幸甚干  
冒威嚴無任悚息不宣某再拜

錢塘集卷十二